

30/07/2024

Aizawl

1830 Hrs

REGIONAL NEWS

HEADLINES:-

1. Tourism Awareness Week hman mekah vawiin khan Tourism Minister Pi Lalrinpuii'n sorkar hmunhma mimal kuta hlan tak enkawltute zirtirna hun a hawng.
2. Kolasib Fast Track Court-in hmeichhe naupang pawngsualtu kum 20 chung hrehawm taka Jail tang tura hremine Heroin neitu hmeichhe pahnih kum 10 chung tang turin a hrem bawk.
3. Paris Olympic neih mekah vawiin khan Manu Bhaker leh Sarabjot Singh te chuan 10m air pistol shooting ah ram tan bronze medal an la.
4. PM-Kisan scheme hnuaiah loneitu vaibelchhe 11 chuang hnenah cheng vaibelchhe nuai 3.24 sem tawh a ni.

<><><>

TOURISM MINISTER

Khualzinte hîp tura hmalakna chi khat chawlhkar khat chung awh tur, Tourism Awareness Week hman mekah vawiin khan Tourism Minister Pi Lalrinpuii'n sorkar hmunhma mimal kuta a hlan tak enkawltute zirtirna hun a hawng.

Tourism Department buatsaih ni 4 chung awh tur, 'Training for Outsource Facilities' hi ATI Training Hall, MINECO Aizawlah hawngin Minister chuan sawrkarin Tourism Department hnuai hmunhma pawimawh tak tak a neihte thawhdunna siama midang enkawl tura a hlan chhan hriatthiampui turin kalkhawmte a chah a; tha lehzual zawka hmunhma leh hmanraw neih angte neitu thinlung pu chung enkawlpui turin a sawm nghal bawk a. Khualzin dawnawn, ei leh in siam dan, nun dan leh hawihier siam that leh sum enkawl dan chungchang thlengin uluk taka ngaihtuahna sen a tul, a ti a. Tourism chu chhiah la lut thei Department a nih piah lamah mipuite ngheng reng Department a nih avangin theihtawp chhuah turin a chah bawk.

Hun hman hi ATI Jt. Director (Admin) Pu Lalhmansanga'n kaihruiin Course Director, Pi Golda Del Zohmangaihi'n training kalpui dan tur a sawifiah a. Tourism Department Director Pi R.Lalrodingi'n Mizoram Tourism dinhmun tarlangin trainee-te fuihna thu a sawi bawk.

<><><>

LUNGLEI - COOPERATIVE

Mizoram Youth Commission (MYC) Chairman Pu Malsawmzuala Ralte chuan Mizo thalaiten ram pawn thlenga eizawna an neih theih nan hmalak zel a ni, a ti.

Lunglei Convention Center-a Cooperative chungchang zirhonaah vawiin khan he thu hi sawiin Pu Malsawmzuala Ralte chuan MYC kaltlanga Mizoram sorkarin All India Service-a Mizo thalai a tam thei ang ber tling tura hma a lakna, Super IAS tih thin chu Mission UPSC tia thlak a ni a, thalai lekhathiamte All India Service-ah nawr luh zel tum an ni, a ti a. British sipai-ah Mizo thalaite an luh theih nan hmalak mek a nih thu pawh sawiin Cabin Crew-a Mizo nulate an luh theih nan Indigo Airlines Company leh Mizoram Sorkar chu an indawr mek, a ti a. Mizo thalaite eizawna atan Japan thiamna hman tum a nih dan te leh

Hotel Management leh Skill development lamah te tan lak zel a nih tur thu a sawi bawk.

MYC leh Lunglei District Cooperative Union ten Cooperative chungchang zirhona an buatsaihah hian thupui thlan bik hrang hranga mithiamte thuziak ngaihthlak a ni.

<><><>

MAMIT - NEW CRIMINAL LAWS

Mamit khawpui chhunga NGO hruaitute, MJA, Police leh Excise and Narcotics department te tan India ram dan thar, New Criminal Laws zirhona buatsaih a ni.

Mamit Dist. Court Recreation Hall-a District Legal Services Authority bultuma zirhona hunah hian Bhartiya Nyaya Sanhita, 2023; Bharatiya Nagarik Suraksha Sanhita, 2023 leh Bharariya Sakshya Adhinyam, 2023 te zirho a ni a. Mamit Chief Judicial Magistrate Pu H. Laldusanga'n heng Dan tharte hi zirtirin hun inher dan leh khawsak azirin dan hman pawh thlak emaw tihdanglam emaw a ngai thin a. Chutih rualin tun hunah dan hlui leh thar danglamna sawifak tur a la awm lova, dan bu hlui leh thar nen chhiar kawpin inzir chhoh mek a ni, a ti a.

Kum 164 chhung lo hman tawh IPC, CrPC, Indian Evidence Act te chu phum bo a ni a, amaherawh Dan thar te hi kumin July ni 1 atanga hman tan a nih avangin July ni 1 hmaa thubuai awm zawng zawngte chu dan hlui hnuai rem tur a la ni, a ti a. Dan tharin a paih then leh a dah belh hrang hrangte a sawifiah bawk.

Dan thar pakhatat nupuia nei tura intiam vanga mipat hmeichhiatna hmanpuia nei leh duh si lo chungah hremna pek theih a ni tawh dawn a. Dam chhung lungin tan hun chhung pawh dan tharah chuan hun bithliah awm tawh lovin dam chhung chu mihring dam chhung a ni tawh dawn bawk a. Dam chhung tang turin a tan chhunga mi a that leh a nih chuan khaihlum nghalna dan thar a awm tawh bawk a. Dan tharah hian tunhmaa hmeichhia leh mipa chauh awm thin chu mahni mipat hmeichhiatna thlak danglamtu 'trans gender' te huamin mi chi hrang pathum an awm tawh dawn a ni, a ti.

<><><>

KOLASIB - DRUG PEDDLERS & RAPIST CONVICTED

Kolasib Fast Track Court-in Heroin kawltu Lily Zothanpari leh Lalpawmawii te chu hrehawm taka kum 10 chhung Jail tang tur leh pawisa Cheng Sing 1 ve ve chawi turin a hrem.

Lily Zothanpari (kum 30) Kolasib Tumpui Veng Inah hian Excise Dept.-in kum 2022 December ni 1 khan Heroin Hawng 50 (gram 853) an man a. A thurualpui Lalpawmawii (kum 38), Sawleng khua nia inchhal pawh an man tel ve bawk a.

He thubuaiah hian thuhretute thusawi zawng zawng uluk taka enfiah a nih hnuah Kolasib Fast Track Court Judge, Pu R.Vanlalena chuan Lily Zothanpari leh Lalpawmawii te hi thiam loh a chantir a. An ruala man ve tho Zonunsangi erawh chu thla leh ni 15-a nau hring tur a nih avangin a thubuai bik hi chu rel leh turin dah rih a ni.

Vawiin vek khan Kolasib Fast Track Court Judge Pu R. Vanlalena hian hmeichhe naupang kum tling lo pawngsualtu K.Rothangliana chu kum 20 chhung hrehawm taka Jail tang tur leh Cheng Sang 7 chawi turin a hrem bawk.

SAITUAL - COMMON SERVICE CENTRE

Saitual District chungga Common Service Centre (CSC) te tana ni hnih chung awh tur e-District Training chu vawiin khan tan a ni. He hun hi Dr. Lalngura Tlau, Saitual Bawrhsapin hmanpuiin CSC-in a ken tel hmasawna tam tak chu mipuiten hriain dawng vek thei se a duh thu leh kuminah an tih turte zaa 100 tihlawhtling ngei turin thawktute a chah a ni.

Saitual District-ah hian khaw 40-ah Village Council 44 a awm a; tunah hian CSC 36 awm tawhin CSC la awm lohna khaw pali - Lailak, Dilkhan, Changzawl leh Chiahpui-ah te pawh CSC a awm theih nan hma lak mek a ni a. Vawiin zirhonaah khaw 13-a CSC te an tel thei a, naktuk a ni hnihna-ah khaw 19-a CSC te an tel ve leh ang.

Common Service Centre (CSC) atang hian Transport Department (Tax and License); Revenue Dept. (NGDRS/IGR Service); E-District (Common Certificate); PM-Kisan (Agriculture); PMIAY (Ayushman Bharat); Income Tax; NPS/PMJAY/PMSYM; PM Vishwakarma; Digital Literacy Scheme (PMGDISHA); Other Educational Resource Services; Digilocker, Scholarship leh thil pawimawg dangte a tih theih a ni.

<><><>

KHAWZAWL - DRIVING TRAINING

Mizoram Govt. Drivers Association, Khawzawl ngenna angin vawiin khan DC Conference Hall-ah lirthei khalh chungchang inzirtirna hun hman a ni a, Addl. DC Pu Lalfakawma'n he hun hi a kaihruai.

He hunah hian Khawzawl SDPO Pu C. Vaninmawia, Traffic Police ASI Pu C. Vanlalruata leh Champhai MVI Pu R. Lalhruaitluanga te'n lirthei khalh chungchanga dan leh hriat tur pawimawh te, lirthei khalh dan mawi leh hawihhawm te, Motor Vehicles Act leh a dan tihdanglam chungchang te, dan bawhchhiat avanga hremna awm thei hrang hrang te an zirtir a. Zawhna leh chhanna hun hman a ni bawk.

<><><>

CHAMPHAI DC MEETS HODS

Champhai District Bawrhsap Pu VL. Remliana'n vawiin khan DC Conference Hall-ah Champhai District chungga sawrkar pisa hotute a kawm.

He hunah hian Bawrhsap chuan sawrkar department-te chuan mahni zawnah hmalakna tur theuh nei mah se, hmasawna lian tham thlen tur chuan department ten tum thuhmun neia thawhhona tha an neih a ngai, a ti a. Champhai District chu Aspirational District Programme-ah telh thuai a nih a beiseiawm thu sawiin, District tana hmasawna tluantling leh chhenfakawm din a nih ngei theih nan an ngaihtuahna seng turin sawrkar department hrang hrang hotute chu a sawm a ni.

He hunah hian Champhai District chungga sawrkar pisa hotute an tel tha hle niin Champhaia kan Corr. chuan a sawi a. Department hnathawh, hmachhawp, hmalakna leh thawhho theihna tur ruahmanna hrang hrang te inpawh tlang takin an sawiho a ni.

<><><>

OLYMPIC

Paris Olympic neih mekah vawiin khan Manu Bhaker leh Sarabjot Singh te chuan 10m air pistol shooting ah ram tan bronze medal an la. South Korean aiawh Oh Ye Jin leh Lee Wonha te 16-10 in an hneh a ni. Heti hian India chuan tun Olympic ah hian bronze medal pahnih a la tawh a. Vawiina bronze medal a lak belh leh tak avang hian Manu Bhaker hian India infiamna huangah bung thar ziakin ramin zalenna a hmuh hnua tum khat Olympic-a medal a pahnih la thei awmchhun a ni nghal bawk a ni. Manu-i hian a hmain 10m Air Pistol ah bronze medal a la tawh bawk a ni.

<><><>

PM KISAN

PM-Kisan scheme hnuaiah loneitu vaibelchhe 11 chuang hnenah cheng vaibelchhe nuai 3.24 sem tawh a ni. Union Agriculture and Farmers Welfare Minister Shivraj Singh Chouhan chuan vawiina Lok Sabha-a ziaka zawhna chhangin he thu hi a tarlang a. PM-Kisan Instalment 17-na chu kumin June thla khan pek chhuah niin loneitu vaibelchhe 9.26 chhungkuaah cheng vaibelchhe sing 2 chuang semral a ni a. Union Minister sawidanin Krishi Sakhis sing 5 sang 1 leh 849 atangin sing 3 sang 4 leh 973 te chu Ariculture Para-extension worker Certificate pek an ni bawk.

<><><>

KERALA LANDSLIDE

Kerala Wayanad district-a leimin nasa tak avangin mi 48 an thi. Thudawn danin ruang hmuh belh zel anih vangin mitthi zat hi a la pun rin a ni a. He vanduaiana thlengah hian mi 122 in hliam an tuar a, Wayanad-a damdawiin hrang hrangah dahluh an ni a. Thuneitute chuan mi 100 chuang chin hriat loh an la awm niin an sawi a. Defence lam thuneitute chuan Kochi atangin Indian Navy tui hleuhthiam mi 30 an tirlut tawh a. Air Force helicopter pahnih Coimbaotore atangin tirhluh an ni tawh bawk a. DSC Centre Kannur leh Territorial Army Battallion Kozhikhode atangin Sipai 200 rualin chhanchhuah hna an thawk mek bawk a ni.

<><><>